

Minister Otmar Oduber

Hopi trabou tumando luga pa nos celebracionnan nacional

Den cuadro di celebracion di 30 aña di nos status aparte y 40 aña di nos Himno y Bandera, pero tambe 60 aña di nos Escudo, tin hopi trabounan andando pa por celebra esaki manera debe ser. Den e siman tras di lomba a firma e “gunnings advies”, cual e contratista Van Kessel ta encarga pa construcion y e trabounan riba Plasa Padu.

Un inversion di mas of menos 1.6 milyon florin cu ta encera henter e aspecto infrastructural y e artista Ciro Abath lo ta esun encarga cu e proyecto pa rindi honor na e tres compositornan di nos Himno cu otro aña lo ta celebrando 40 aña di existencia.

Ta trata di un obra di arte cu ta ilustra e propio Padu Lampe, conhuntamente cu su dos amigonan y co compositornan di nos Himno Nacio-

nal, Rufo Wever y Hubert Lio Booi. Di e forma aki ta duna tambe reconocimento na e tres baluartenan aki cu ta graba den historia di Aruba. Minister Otmar Oduber ta comenta cu e trabounan aki mester culmina prome cu 18 di maart pa e gran celebracion por tuma luga riba Plasa Padu tambe.

Un otro proyecto cu tambe mester completa prome cu e fecha menciona ta e trabounan na Plasa Betico Croes. Minister Oduber ta bisa: “Nos a tuma decision conhuntamente cu Departamento di Cultura, cu ayudo financiero di Oficina di Turismo y tambe Fondo Desaroyo Arubano cu a traves di Unoca a mira e importancia pa un otro herencia cultural cual ta Plasa Betico cu casi despues di 30 aña no a ricibi un mantencion debido, cu lo inverti rond di 1 milyon Flo-



rin pa mehoracion di e plasa. Hopi ta esunnan cu por a nota e condicionnan bastante fastioso cu e plasa aki ta den dje, unda awor cu e inversion, pa e proximo celebracion dia 17 di maart, lo por tin por lo menos un miho plasa.” Lo mehora e area di e koepel unda henter e aspecto infrastructural di esaki lo ta bek den condicion, y cambio

completo den electricidad. Tambe e koepel lo conoce un expansion y lo drecha e area bou di stage y tambe e espacio unda e artistanan ta haci uzo durante nan presentacion lo conoce mehoracion den infraestructura. Sr. Oduber ta sigui comenta: “Cu e mehoracion di Plasa Betico awor lo por tin un espacio disponibel, cu henter aña por

wordo poni na disposicion di nos comunidad. Banda di e actividadnan cu nos tin custumber di dje awor tin espacio pa entrenamiento di baile, teatro of musica kisas. Banda di e plasa mes cu mehoracion di e koepel completo tin mas espacio pa sigui desaroya no cultura.” E mandatario a comenta cu a acerca Cas di Cultura pa por yega na un asina yama “beheersovereenkomst”, pa di e forma aki Cas di Cultura por keda encarga cu maneho di Plasa Betico.

Percura pa maneho diario, huur y uzo di e plasa den un forma continuo. Minister Oduber ta finalisa bisando: “Nos kier pa durante henter aña tin actividad pa di e forma aki por mantene Plasa Betico den su top condicion y pa e no bay for di man manera a pasa den pasado unda awe mester haci un inversion asina grandi.” □